

菩薩摩訶薩欲徧知佛大慈大悲等當習行般若波羅蜜

「大智度論」集粹之廿六

智
銘

佛大慈大悲，大慈與一切衆生樂，大悲悲一切衆生苦；大慈以喜樂因緣與衆生，大悲以離苦因緣與衆生。如是等差別。有大慈大悲，亦有小慈小悲，如四無量中慈、悲名爲小；十八不共法次第所說大慈、悲，名爲大。又諸佛心中慈悲名爲大，餘人心中心名爲小。菩薩行大慈大悲者，於佛爲小，於二乘爲大，此是假若爲大；佛大慈、大悲，真實最大。小慈，但心念與衆生樂，實無樂事；小悲，名觀衆種種身苦、心苦，憐愍而已，不能令脫。大慈者，念令衆生得樂，亦與樂事；大悲，憐愍衆生苦，亦能令脫苦。凡夫人、聲聞，辟支佛、菩薩慈悲，名爲小，諸佛慈悲乃名爲大。大慈，從大人心中生十力、四無所畏、四無礙智、十八不共法，大法中出，能破三惡道大苦，能與三種大樂：天樂、人樂、涅槃樂。是大慈徧滿十方三世衆生，乃至昆蟲，慈徹骨髓，心不捨離。三千大千世界衆生墮三惡道，若人一一皆代受其苦，得脫苦已，以五所欲樂、禪定、世間最上樂，自恣與之皆令滿足；比佛慈悲，千萬分中不及一分。何以故？世間樂欺誑不實，不離生死故。

佛所有功德法，應皆爲大，而但稱慈、悲爲大者，蓋慈悲是佛道之根本。所以者何？菩薩見衆生老、病、死苦，身苦、心苦，今世、後世苦等諸苦所惱，生大慈、悲，故如是苦，然後發心求阿耨多羅三藐三菩提；亦以大慈、悲力故，於無量阿僧祇劫生死中，心不厭沒，以大慈、悲力故，應得涅槃而不取證。以是故，一切諸佛法中，慈、悲爲大。若無大慈大悲，便早入涅槃。

佛得佛道時，成就無量甚深禪定，解脫三昧，生清淨樂，捨棄不受；入聚落城邑中，種種譬喻，因緣說法；變現其身，無量音聲，將過一切，忍諸衆生罵詈誶謗，乃至自作伎樂，皆是大慈、大悲力。復次，大慈、大悲，大名非佛所作，衆生名之，譬如師子大力，不自言大。衆生聞佛種種妙法，知佛爲祐利衆生故，於無量阿僧祇難行能行，衆生聞見是事，而名此法爲大慈、大悲。世世爲一切衆生故，以頭目腦髓布施，盡爲一切衆生，一切衆生聞見是事，即共名之爲大慈、大悲。佛因衆生所名，故言大

慈、大悲。

佛智慧所能，無不徧知者。大慈大悲故，世世不惜身命，捨禪定樂，救護衆生，人皆知之。以是故，衆生不以佛智慧爲大，而以慈、悲爲大。蓋佛智慧，可比類知，不能了了知；而慈悲心，眼見耳聞，處處變化大師子吼，是故可知。復次，佛智慧細妙，諸菩薩、舍利弗等尚不能知，何況餘人？慈悲相可眼見、耳聞故，人能信受，智慧深妙，不可測知。復次，是大慈大悲，一切衆生所愛樂；人多樂故，稱慈悲爲大。智慧者得道人乃能信受，大慈悲相，一切雜類皆能生信，如見像，若聞說，皆能信受，多所饒益故，名爲大慈、大悲。大智慧名捨相，遠離相；大慈悲爲憐愍利益相，是憐愍利益法，一切衆生所愛樂，以是故名爲大。

是大慈大悲，如持心經中說：大慈大悲有三十二種，於衆生中行。是大慈大悲攝相緣，如四無量心說。復次，佛大慈大悲等功德，不應一切如迦旃延法中分別求其相。上諸論議師，雖用迦旃延法顯示，不應盡信受。所以者何？迦旃延說大慈大悲，一切智慧，是有漏法、繫法、世間法，是事不爾。何以故？大慈悲若爲一切佛法之根本，云何言是有漏法、繫法、世間法？菩薩未得佛時大慈悲，若言有漏，其失猶可；佛得無礙解脫智故，一切諸法皆清淨，一切煩惱及習盡。何以故說佛大慈悲應是有漏？諸佛力勢不可思議，諸聲聞、辟支佛，不能離衆生想而生慈悲，諸佛能離衆生想而生慈悲。今佛十方求衆生不可得，亦不取衆生相而生慈悲。「無盡意經」中說有三種慈悲：衆生緣、法緣、無緣。

一切衆生中，唯佛盡行不誑法，若佛於衆生中取相而行慈悲心，不名行不誑法。何以故？衆生畢竟不可得故。佛一切智能斷一切諸漏，能從一切有爲法中出，能作無漏因緣，佛大慈大悲云何仍是有漏！無漏智慧，何以故不能緣一切法？有漏智是假名虛誑，勢力少故，不應真實緣一切法。聲聞法中十智，摩訶衍法中有十一智，名爲如實智。是十智入如實智中，都爲一智，所謂無漏智，如十方水入大海水中，都爲一味。是大慈、大悲，佛三昧

王三昧、師子遊戲三昧所攝，是無漏法。菩薩摩訶薩欲徧知佛大慈大悲，當習行般若波羅蜜。

菩薩摩訶薩欲得道慧，當習行般若波羅蜜，菩薩摩訶薩欲以道慧具足道種慧，當習行般若波羅蜜。道名一道，一向趣涅槃，於善法中一心不放逸，道隨身心念故。道復有二道：惡道、善道；世間道、出世間道；定道、慧道；有漏道、無漏道；見道、修道；學道、無學道；信行道、法行道；向道、果道；無礙道、解脫道；信解道、見得道；慧解脫道、俱解脫道。如是無量二道門。

復有三道：地獄道、畜生道、餓鬼道。三種地獄：熱地獄、寒地獄、黑闇地獄。三種畜生道：地行、水行、空行。三種鬼道：餓鬼、食不淨鬼、神鬼。三種善道：人道、天道、涅槃道。人有三種：作罪者、作福者、求涅槃者。復有三種人：受欲行惡者、受欲不行惡者、不受欲不行惡者。天有三種：欲天、色天、無色天。涅槃道有三種：聲聞道、辟支佛道、佛道。佛道復有三種：初發意道、行諸善道、成就衆生道。復有三種：戒道、定道、慧道。如是等無量三道門。復有四種道：凡夫道、聲聞道、辟支佛道、佛道。復有四種道：聲聞道、辟支佛道、菩薩道、佛道……如是等無量道門，知是諸道，盡知、徧知，是爲道種慧。

以上所云種種道，皆入一道中，所謂諸法實相，初學有種種別，後皆同一，無有差別。爲引導衆生故，菩薩分別說是種種道。所謂世間道，出世間道等。所以分別世間道、出世間道者，世間名，但從顛倒憶想、虛誑二法生，如幻、如夢、如轉火輪，凡夫人強以爲世間。是世間皆從虛妄中來，今亦虛妄、本亦虛妄。其實，無生無作，但從內外六情、六塵和合同緣生。隨凡夫所著故，爲說世間。是世間種種邪見網羅，如亂絲相著，常往來生死中，如是知世間。

至於出世間道，如實知世間，即是出世間道。所以者何？智者求世間、出世間，二者不可得。若不可得，當知假名爲世間、出世間。但爲破世間故，說出世間。世間相即是出世間，更無所

復有。所以者何？世間相不可得，是出世間。是世間相常空，世間法定相不可得故。如是行者不得世間，亦不著出世間。若不得世間，亦不著出世間，愛慢破故，不共世間諍。何以故？行者久知世間空無所有，虛誑故，不作憶想分別。行者觀是世間、出世間，實不可見，不見世間與出世間合，亦不見出世間與世間合；離世間亦不見出世間，離出世間亦不見世間，如是則不生二識，所謂此世間、出世間。若捨世間，不受出世間，是名出世間。若菩薩能如是知，則能爲衆生分別世間、出世間道。有漏、無漏一切諸道，亦如是入一相，是名道種慧。

菩薩摩訶薩欲以道種慧具足一切智，當習行般若波羅蜜，欲以一切智具足一切種智，當習行般若波羅蜜。一切智者，總破一切法中無明闇，一切種智者，觀種種法門破諸無明。一切智，譬如說四諦；一切種智，譬如說四諦義。一切智者，如說苦諦；一切種智者，如說八苦相。一切法名眼色乃至意法，是諸阿羅漢、辟支佛亦能總相知無常、苦、空、無我等；如是十二入故，名爲一切智。聲聞、辟支佛當不能盡別相知一衆生，生處好醜，事業多少；未來、現在，亦如是，何況一切衆生？好惡、貴賤，因而得福，因而得道，如是現事尚不能知，何況心心數法？所謂禪定、智慧等諸法，佛盡知諸法總相、別相故，名爲一切種智。後品中，佛自說：一切智是聲聞、辟支佛事。道智是菩薩事，一切種智是佛事。佛一切智、一切種智，皆是眞實。是故，佛是實一切智、一切種智。有如是無量名字，或時名佛爲一切智人，或時名爲一切種智人。

六波羅蜜卽是道，知是道、行是道，得一切智。初發心乃至坐道場，於其中間一切善法，盡名爲道。此道中分別思惟而行，是名道智。佛道大故，名爲道智。聲聞、辟支佛道小故，不名道智。菩薩摩訶薩自行道，亦示衆生各各所行道，以是故，說名菩薩行道智，得一切智。一切智知一切法，何名一切法？如佛告諸比丘：爲汝說一切法，何等是一切法？所謂眼色、耳聲、鼻香、舌味、身觸、意法。是十二入名一切法。復有一切法，所謂名色。

復次，一切法，所謂色、無色法，可見、不可見，有對、無

對，有漏、無漏，有爲、無爲，心、非心，心相應、非心相應，共心生、不共心生，隨心行、不隨心行，從心因、不從心因，如是等無量二法門攝一切法。復次，一切法，所謂善法、不善法，無記法；見諦道斷、思惟所斷、不斷法；有報法、無報法、非有報非無報法；如是等無量三法門攝一切法。……如是等種種無量阿僧祇法門所攝諸法，以是無礙智慧盡徧知上諸法，名爲一切智、一切種智。

一切衆生皆求智慧，獨佛一人得一切智，佛於一切衆生中第一故，獨得一切智。佛自利益亦利益他故，於衆生中第一。一切戒中聖戒第一，一切解脫中不壞解脫爲第一，一切清淨中解脫爲第一，一切諸觀中空觀爲第一，一切諸法中涅槃爲第一。如是等無量各爲第一。佛亦如是，於一切衆生最爲第一。第一故，獨得一切智。復次，佛從初發意，以大誓莊嚴，一切衰沒衆生欲拯濟故，盡徧行諸善道，無善不集，無苦不舒，皆集一切諸佛功德，如是等種種因緣故，佛於一切衆生中獨第一。

薩婆若多者，「薩婆」此言「一切」，「若」此言「智」，「多」此言「相」。佛知是一切法，一相、異相、漏相、非漏相、作相、非作相等，一切法各各相、各各力、各各因緣、各各果報、各各性、各各得、各各失。一切智慧力故，一切世一切種盡徧解知。以是故說：欲以道種智具足得一切智，當習行般若波羅蜜。欲以一切智具足一切種智，當習行般若波羅蜜。

欲以一切種智斷煩惱習，當習行般若波羅蜜，菩薩摩訶薩應如是學般若波羅蜜。一心中得一切智、一切種智、斷一切煩惱習，此中爲令人信般若波羅蜜故，乃次第差別說：以一切智具足得一切種智，以一切種智斷煩惱習。是欲令衆生得清淨心，是故如是說。復次，雖一心中得，亦有初、中、後次第。如一心有三相：生因緣住，住因緣滅。又如心心數法，不相應諸行，及身業、口業。以道智具足一切智，以一切智具足一切種智，以一切種智斷煩惱習亦如是。先說一切種智，卽是一切智。

道智，名金剛三昧，佛初心卽是一切智、一切種智，是時煩惱習斷。一切智、一切種智相，先已說。斷一切煩惱習者，煩惱

名畧說則三毒，廣說則三界九十八使，是名煩惱。煩惱習名煩惱殘氣，若身業、口業不隨智慧，似從煩惱起。不知他心者，見其所起，生不淨心，是非實煩惱，久習煩惱故，起如是業。如是習氣，諸餘賢聖雖能斷煩惱，不能斷習。如難陀淫欲習故，雖得阿羅漢道，於男女大眾中坐，眼先視女象，而與言語說法。如舍利弗瞋習故，聞佛言舍利弗食不淨食，即便吐食，終不復受請。如摩阿迦葉瞋習故，佛滅度後集法時，敕令阿難八突吉羅懺悔，而復自牽阿難手出，不共其漏未盡不淨人集法。如畢陵伽婆蹉常罵恒神爲小婢。如摩頭婆私陀掉戲習故，或時從衣架掉上樑，從樑至棚，從棚至閣。如是等諸聖人，雖漏盡而有煩惱習。佛以一切智慧火，燒諸煩惱，無復殘習。如一婆羅門，以五百種惡口，象中罵佛，佛無異色，亦無異心。此婆羅門心伏，還以五百種語讚佛，佛無喜色，亦無悅心，於此毀譽，心色無變。又旃遮婆羅門女，帶盂謗佛，佛無慚色，事情既露，佛無悅色。轉法輪時，讚美之聲滿於十方，心亦不高，孫陀利死，惡聲流布，心亦不下。阿羅毗國土風寒，又多疾藜，佛於中坐臥，不以爲苦。又在天上歡喜園中，夏安居時，坐劍婆石，柔軟清淨，如天蜿蜒，亦不以爲樂。受大天王跪奉天食，不以爲美，毗蘭若國食馬麥，不以爲惡，諸大國王供奉上饌，不以爲得，入薩羅聚落，空鉢而出，不以爲失。提婆達多於耆闍崛山，推石壓佛，佛亦不憎，是時羅睺羅敬心讚佛，佛亦不受。阿闍世縱諸醉象，欲令害佛，佛亦不畏，降伏狂象，王舍城人益加恭敬，持香花瓔珞出供養佛，佛亦不喜。九十六種外道，一時和合議言；我等亦皆是一切智人，從舍婆提來，欲共佛論議。爾時，佛以神足從臍放光，光中皆有化佛。國王波斯匿亦命之令來，於其座上尙不能得動，何況能得與佛議論？佛見一切外道賊來，心亦無退。破是外道，諸天外道倍益恭敬供養，心亦不進。如是等種種因緣來欲毀佛，佛不可動，經諸毀辱誹謗論議，不動不異。以是故，知佛諸煩惱習都盡無餘。

是以，菩薩摩訶薩，欲斷諸結使盡，無復遺餘，於煩惱重賊，誅拔根本，令無遺餘。以是故說：欲以一切種智斷一切煩惱習，當習行般若波羅蜜。

詩篇

慧炬新厦落成三師紀念堂佛像開光

偕弟僧一同賀

鄭烘雲寬受

其一

名僧活佛何南北，淨業千秋在一身，三聖二賢真懋德，振奇發秀佛功臣。

其二

鼓衆警時揚正因，手然慧炬啟天真，覺華此日亭亭列，難得淨廬老主人。

注：年時聞稱虛老和尚印老法師爲南北兩活佛。

癸亥端陽寄自紐約綠村銀樓觀音閣

辛酉燈節忽得花卉

辛酉元旦，僧一市得金魚花，高懸四垂，群魚戲藻，以此相策。

尋花鬧市得金魚，好拜觀音樂有餘，率性游空皆得所，相持一道學如如。

其一

吉祥花草號觀音，雲壑棲遲且至今，桂樹茗柯俱一性，眞源底處好追尋。

——僧一按：「吉祥草」亦名觀音草，原產我國南部，江南之家多栽植，日人亦酷喜栽培，又佛所行讚亦有吉祥草，爲吉祥童子所奉故名，佛敷之爲座以成道。「茗柯」世說賞譽注：茗之柯枝雖小，中有實理。

其二

花有瑞香草吉祥，相逢相值月團圓，賞音雲外忘羈索，共護心燈照大千。